

Uponyaji kwa Ajili ya Upofu wa Kiroho

Bwana ya karibu na wote wamwitao, Wote wamwitao kwa uaminifu—Zaburi 145:18.

Yesu hakupata chupa kwa ajili ya divai Yake mpya kwa waandishi, mafarisayo na watawala. Alilazimishwa kuwaacha na kuwaendea watu wanyenyekevu, ambao mioyo yao haikuwa imejawa na husuda, tamaa na kujihesabia haki. Wavuvi wanyenyekevu walitii wito wa Mwalimu wa mbinguni, wakati waandishi na mafarisayo walikataa kuongolewa.

Wanafunzi ambao Yesu aliwaita hawakuwa wenye elimu na walikuwa mbali na kuwa wakamilifu katika tabia pale Yesu alipowaunganisha Naye Mwenyewe; lakini walikuwa tayari kujifunza kutoka kwa Mwalimu mkuu ulimwengu kuwahi kumjua. Walikuwa watu waliongolewa kweli kweli na wakawa chupa mpya ambazo kwazo Yesu angemimina divai mpya ya ufalme Wake. Lakini ingawa walikuwa wameongoka kwa imani ya Yesu, bado, kwa sababu ya ukomo wao wa ufahamu wa kidunia matokeo ya mafundisho waliyokuwa wamesikia kutoka kwa Wayahudi hawakuweza kuelewa kikamilifu asili ya ukweli wa kiroho Alioutoa. Mzigo wa mafundisho Yake ulikuwa ni umuhimu wa wafuasi Wake kuwa na mioyo safi na mitakatifu, kwa maana ni utakatifu pekee ambao ungewafanya kufaa kuwa raia wa ufalme Wake wa mbinguni.

Mpanzi wa Mungu alitawanya punje za mbegu za thamani, ambazo hatuwezi kuiona mpaka mtenda kazi stadi, chini ya uongozi wa Roho Mtakatifu, azikusanye pamoja na aziwasilishe kwetu kama utaratibu kamili wa ukweli, akifunua kina cha upendo wa Mungu. Kwa zama zote Yesu, mwasisi wa ukweli, kupitia kwa manabii na watu, alikuwa amewasilisha ukweli juu ya ukweli kwa Wayahudi, toka kwa nguzo ya wingu na moto. Lakini ukweli aliokuwa ameutoa ulikuwa umechanganywa na makosa na ilikuwa ni muhimu utengwe mbali na uhusiano wa uasi wa kidini na uovu. Ilikuwa ni muhimu kuweka sawa tena katika mfumo wa injili, ili kwamba uweze kuangaza katika mng'ao Wake wa asili na kuangazia giza la kimaadili la ulimwengu. Popote Alipopata kito cha ukweli ambacho kilikuwa kimepotezwa mbali na mpango wake, au kilikuwa kimeharibiwa na makosa, Alikirejesha upya na kukiweka juu yake muhuri wa Yehova. Alijidhihirisha Mwenyewe kuwa Neno na Hekima ya Mungu.

Mambo ya kawaida ya wakati na dunia yalivuta akili za watu wa wakati wa Yesu, kama ambavyo Shetani alikuwa amepanga yawe. Dhambi ilikuwa imeondosha kutoka moyoni upendo wa Mungu na badala ya kumpenda Mungu moyoni kulikuwa na kuupenda ulimwengu, upendo wa kutenda dhambi na wa tamaa mbaya. Ni Yesu tu ambaye angeweza kuweka sawa madai kati ya mbingu na dunia. Macho ya mwanadamu yalikuwa yametiwa upofu, kwa sababu hakudumu kuutazama ulimwengu wa kiroho na wa milele.... Utakatifu wa Mungu ulifunuliwa katika nafsi na kazi ya Yesu, kwa maana Yesu Kristo alikuja kumfunua Baba
(The Signs of the Times, Desemba 11, 1893).